



**DISKURSU HOSI SUA EXSELÉNSIA MINISTRU
PREZIDÉNSIA KONSELLU MINISTRUS,
AGIO PEREIRA,
IHA SIMU POSE BA PREZIDENTE KONSELLU
ADMINISTRASAUN RTTL, EP**

Palásiu Governu, loron 13 fulan-marsu tinan 2025

Karus Membrus Governu,

Distintu konvidadu sira,

Ho onra boot ohin ita halibur hamutuk hodi fó pose ba Prezidente foun Konsellu Administrasaun Rádiu no Televizaun Timor-Leste, EP (RTTL, EP), Elizeu Isaac Fernandes. Ida-ne'e momentu significativu ida ba ita-nia komunikasaun sosiál, ba misaun servisu públiku RTTL nian no ba hametin ita-nia demokrasia.

Uluk nana'in, ha'u hakarak ható'o ha'u-nia rekoñesimentu no apresiasaun ba serbisu ne'ebé hala'o ona husi Prezidente sesante, José António Belo "Taraleu". Ami-nia agradesimentu ba ita-boot nia dedikasaun no kompromisu ba instituisaun fundamentál ida-ne'e ba sociedade timorensa.

Ohin, ita hahú siklu foun ida ho tomada-de-pose Elizeu Isaac Fernandes ba kargu responsabilidade boot ida-ne'e. Desizaun Governu replete rekoñesimentu ba nia kompeténsia téknika, esperiénsia jestaun no kompromisu ba misaun RTTL nian. Ami dezeja susesu tomak ba ita-boot hodi lidera instituisaun ida-ne'e, hodi fiar katak ita-boot sei kontinua serbisu ne'ebé halo ona no katak ita-boot sei sai forsa ida ne'ebé dudu estratéjia foun sira ba futuru.

Señór Prezidente,

RTTL nia misaun define momoos iha Dekretu-Lei n. 42/2008, ne'ebé transforma ba empreza pública no estabelese nia atribuisaun sira nu'udar konsesionáriu ba servisu radiodifusaun pública. Misaun ida-ne'e inklui

asegura informasaun, formasaun no promosaun identidade nasionál, hodi garante servisu rádiu no televizaun ida ne'ebé imparsiál, plurál no asesivel ba sidadaun hotu-hotu. Ida-ne'e maka kompromisu ida ba transparénsia, kultura no partisipasaun ativa povu nian iha konstrusaun ita-nia país.

Iha kontestu ida-ne'e, Governu Konstitusionál IX nia prioridade mak atu hametin setór komunikasaun sosiál, hodi garante ninia independénsia no ninia kapasidade atu dezempeña papél ida ne'ebé esensiál iha vida demokrátika Timor-Leste nian. Governu sei kontinua fó apoiu ba RTTL hodi moderniza nia infraestrutur, atualiza teknolojia no kapasita ninia profisionál sira. Implementasaun Planu Estratéjiku ba empreza ne'e sei sai xave atu hadi'a kualidade informasaun no habelar nia kobertura iha nivel nasionál.

Ita hakarak RTTL ida ne'ebé forte, inovativu no asesivel liután, ne'ebé promove ita-nia lian, ita-nia kultura no valór sira sidadania nian. Informasaun ho kualidade sai nu'udar ai-riin ida ba demokrasia, no ita-nia rádiu no televizaun públiku iha papél sentrál ida hodi habelar koñesimentu no promove debate públiku kona-ba ideia sira.

Modernizasaun RTTL tenke akompañia ho kompromisu ne'ebé la nakdoko ba étika jornalístika, rigór informativu no imparcialidade. Komunikasaun sosiál tenke sai espasu ida iha ne'ebé lian hotu-hotu iha oportunidade atu espresa sira-nia-an no iha ne'ebé sidadaun sira bele hetan informasaun ida ne'ebé kredível no ekilíbriu.

Ita-boot nia nomeasaun, señór Prezidente, nu'udar etapa foun ida ba instituisaun ida-ne'e. Ami sura ho ita-boot nia kompromisu atu kontinua

hametin RTTL nu'udar referénsia ba servisu públiku, hodi aseguira kumprimentu ba ninia devér sira ba sosiedade no kontribui ba hametin setór komunikasaun sosiál nasional.

Dezafiu ne'e boot, maibé ami iha serteza katak, ho ita-boot nia lideransa no kompromisu hosi profisionál RTTL tomak, ita sei bele halo progresu hodi konkretiza objetivu sira ne'ebé estabelese ona. Governu sei mantein ita-boot nia apoiu no kolaborasaun, hodi garante katak ita-nia rádiu no televizaun pública kontinua sai espasu ida ba informasaun ho kualidade, diversidade kulturál no promosaun valór demokrátiku sira.

Ba maluk sira hotu ne'ebé servisu liron-loron hodi hato'o informasaun ba populasaun tomak iha país ne'e, ami-nia rekoñesimentu no enkorajamentu. Komunikasaun sosiál nu'udar ai-riin fundamentál ida ba ita-nia Estadu Direitu, no RTTL iha papél desizivu ida iha prosesu ida-ne'e.

Señór Prezidente, ami dezeja ba ita-boot mandatu ne'ebé susesu, orientadu husi inovasaun, kompromisu ba servisu públiku no respeitu ba valór sira ne'ebé orienta komunikasaun sosiál iha Timor-Leste.

Obrigadu barak!